



partii naleraq

20.okt 2015

UKA2015/133

Aalisarnermik piniarnermillu inuussutissarsiutillit inuussutissarsiornerannik siuarsaanermut inatsisip (ESU) allanngortinneqarsinnaanera pillugu – taassumalu kingunissai pillugit – Naalakkersuisut misissuinissaannik Inatsisartut aalajangiiffigisassaattut siunnersuut, taamaalilluni siunissami inuussutissarsiutigalugu umiatsiaaqqap pissarsiarinerata nalingata 60 %-ianik inuussutissarsiornermi siuarsaanissaq pillugu taarsigassarsiisoqarsinnaanngorlugu. Misissuinerup inernera kingusinnerpaamik aggstip aallaqqaataani 2016-imi Inatsisartunut agguaanneqassaaq.

(Inatsisartuni ilaasortaq Nikolaj Jeremiassen, Siumut)

Inatsisartunut ilaasortaq Nikolaj Jeremiassen Siumut siunnersuuteqarpoq Aalisarnermik piniarnermillu inuussutissarsiutillit aningaasanik taarsigassarsisinnaanerisa nutarteriffigineqarnissaanik misissuisoqarnissaanik siunnersuuteqarluni tamannalu soqutiginarlipparput.

Aalisarnermi piniarnermilu aningaasalersuisarneq siunissami isumannaatsumik inissisimajuarnissaa pingaaruteqarluinnartoq Partii Naleqqamiit oqaatigissavarput. Ukiorpasuarni suli aalisarnermik piniarnerlu inuussutissarsiutit pingaarnersarissavaat taamaattumik isumannaatsumik nunatta karsianiit aningaasalersuinikkut sinaakkutaqarluni aaqjissuunneqarnissaa pingaartorujussuummat.

Umiatsisararsortut nutaamillu aalisariutitaarniartut eqqarsaatigalugit aningaasat atugassiissutigineqartut amigarluinnartut oqaatigisariaqarpoq. Taamaattumik siunissami qanoq aningaasalersuisoqassanersoq umiatsiaqqanut angallatinullu aalisariutinut ersarissumik sinaakkutassaqaqtariaqarpoq pingaartumik ukiuni makkunani aalisakkat takkukkiartuinnarfianni.

Aningaasat umiatsiarartarniartunut immikkoortinneqartartut amigarput aningaasallu atugassiissutigineqartussat annertusarnissaat aammalu taarsigassarsinikkut umiatsiarartaarsinnaanerit eqqarsaatigisariaqarput.

Ilaatigummi aningaasat amigarpallaarneri pissutigalugit umiatsiarartaarniartut ukiut arlallit utaqqisarput ilaallu periarfissaarutivittarlutik. Umiatsiararsorneq tassaavoq ulluinnarni ilaqtariippasuarni inuuniarnikkut tunngaviulluinnartoq imaalliallaannaq allamik inuussutissarsiummik taarserneqarsinnaanngitsoq pingaartumik ukiuni makkunani suliffissaqarniarnikkut ajornartorsiorfimmi.

Aammalu ulluinnarni inuiaqatigiit imminnut pilersorneranni neqissaqarniarnemilu assorujussuaq umiatsiararsortut pilersuinerat pingaaruteqarpoq nunatsinnilu aningaasaqarnikkut annertuumik

kivitseqataallutik neqimmi avataniit eqqussukat aamma annertuumik umiatsiararsortut pilersuineranni killilersimaarneqarluartarmata.

Aningaasanut inatsisissaq misissoraanni suli ilungersunarnerulissasoq takusinnaavarput aningaasat atugassiissutigineqartussat suli ikilisarniarneqarput ilaatigullu aamma tapiissutaasinnaasut piiarniarneqarlutik soorlu aallarteqqinnissamut aningaasaliissutit tamarmik peerniarneqarput tamannalu aalisartunnut piniartukkunnullu ajornartorsiornerminni saaffissatuaat peerneqartussanngorlugu naalakkersuisut siunnersuuteqarmata.

Taamaakkaluartoq suli aalisartuniik aningaasanik amerlanerusunik Naalakkersuisoqatigiit aallerniarlutik pilersaaruteqarput, aalisagartassanik akitsuutit eqqunniarpaat taakkualu ukiut tulliit missingersuusiorfiit qiviaraanni 165, -milliuninit naleqarput.

Taamatut siunnerfileeriarlutik taava aalisarnerup siuarsarneqarnissaanut aningaasalersuinissat ikilisaaffiginiarneqarput taamatullu siunnerfeqarneq Partii Naleqqamiit paasisinnaanngilluinnarparput

Aalisarnermi aningaasalersuinissat kiisalu siunnersorteqarnikkut periarfissat ajornerulernissaat siunniunneqarpoq tassami KNAPK-imi siunnersorteqarnikkut pitsaasumik aalisartunut piniartunullu sullissinerit peerniarneqarmata.

Aalisartunut aningaasalersuinerit apparsarneqarput annertuumik tamannalu pissusissamisuunngitsoq Partii Naleqqamiit oqaatigissavarput.

Partii Naleqqamiit neriutigaarput taamatut siunnerfeqarnerit peerneqarluinnassasut tassami inuussutissarsiornikkut ajornartoormi tapiissutigalugit ikiorsiissutigineqartut aningaasat tapiissutigineqartartut amerlanerujussuanngorlutik inuiaqatiginnut suliffeqartitsinikkut imminullu pilersornerunikkut avammullu tunisassiornikkut utertinneqartarmata.

Taamaattumik tapiissutaannarnik aalisartut piniartullu isumalluuteqarnerarlugit oqartarneq ilumuunngilluinnarpoq ilisimasallu killeqarneranik pissuteqaannarluni.

Taamatut oqaaseqarluta siunnersuut aalisarnermi ataatsimiititaliami suliarineqarnissaa innersuussutigaarput.

Hans Enoksen